

Jom makan durian erat hubungan baik UMP dan Media



Kuantan, 19 Ogos – Program Mesra Media `Jom Makan Durian` anjuran Universiti Malaysia Pahang (UMP) yang berlangsung semalam disambut meriah dengan kehadiran lebih 30 pengamal media termasuk wartawan dan jurufoto media di negeri Pahang serta pengurusan universiti.

Hadir meraikan tetamu, Naib Canselor UMP, Profesor Dato' Dr. Daing Nasir Ibrahim, Timbalan Naib Canselor (Akademik dan Antarabangsa), Prof. Dato' Dr. Rosli Mohd. Yunus, Timbalan Pendaftar (Hal Ehwal Pelajar dan Alumni), Prof. Dato' Dr. Yuserrie Zainuddin, Pemangku Pendaftar, Abd. Rahman hj. Safie dan Ketua Pustakawan, Haji Ruslan Che Pee.

Turut hadir Pengerusi Yayasan Amik Tunas Bangsa Permatangsiantar, H.M.A Ridwan Syahputra, Dekan Fakultas Ilmu Komputer & Teknologi Informasi, Universiti Sumatera Utara, Prof. Dr. Muhammad Zarlis.

Pada program ini Profesor Dato' Dr. Daing Nasir mempengerusikan sidang media bagi berkongsi tentang perkembangan universiti termasuk Laporan Interim Pencapaian Pelan Strategik UMP dan Pelan Strategik Pengajian Tinggi Negara (PSPTN) 2011-2015.

Katanya, UMP akan meneruskan pelan strategik universiti yang seiring dengan Pelan Pembangunan Pendidikan Malaysia 2015-2025 (Pendidikan Tinggi) [PPMPT] yang dilancarkan pada tahun ini.



Pada masa yang sama beliau juga berkongsi kejayaan dengan pencapaian staf akademik . Berdasarkan laporan MyRA (2012-2014) yang dibuat oleh Kementerian Pendidikan Tinggi bagi 2014 bilangan penerbitan di dalam jurnal berindeks per staf akademik bagi UMP berada di kedudukan ketujuh (0.7) mata sitasi berbanding dengan 20 IPTA lain bilangan sitasi per staf akademik bagi UMP (2.4) berada pada kedudukan keenam iaitu di bawah lima universiti penyelidikan iaitu Universiti Malaya (9.8), Universiti Putra Malaysia (8.5), Universiti Sains Malaysia (8.3) dan Universiti Teknologi Malaysia (5.2) yang merupakan petanda besar bahawa UMP mampu bersaing dengan lain-lain universiti dengan sokongan warga penyelidikannya.

Universiti juga memperkenalkan program MyGift sebagai satu usaha mengumpul sumbangan daripada mana-mana pihak bagi menyalurkan sumbangan endowmen bagi tujuan tajaan pelajaran, penyediaan kemudahan prasarana kepada pelajar mahupun membudayakan semangat membantu golongan yang memerlukan.

Sembilan jenis endowmen atau tabungan yang dilaksanakan adalah Endowmen Kursi, Endowmen Biasiswa Pelajar, Endowmen Makmal/Kemudahan, Tabung Ramadan, Tabung Masjid, Tabung Bencana, Tabung Wakaf, Tabung Komuniti dan Tabung Tidak Patuh Syariah.

Menurut Profesor Dato' Dr. Daing Nasir, program MyGift ini diperkenalkan sebagai kemudahan kepada warga kampus dan alumni serta pihak luar terutamanya daripada industri mahupun syarikat untuk sama-sama menyumbang kepada tabung endowmen universiti.

"Sebagai contoh endowmen Kursi merupakan dana atau derma dari mana-mana pertubuhan atau yayasan sukarela untuk penubuhan Kursi Kecemerlangan di universiti seperti dalam menjalankan aktiviti seperti wacana ilmiah, akademik, penyelidikan, penerbitan dan perkongsian ilmu serta pembinaan kapasiti," katanya dalam Program Mesra Media 'Jom Makan Durian' yang diadakan di UMP Pekan.

Selain itu dari segi pembangunan di kampus Pekan, pada masa ini tiga bangunan melibatkan Pusat Bahasa Moden & Sains Kemanusiaan (PBMSK), Pusat Teknologi Maklumat dan Komunikasi (PTMK) Dewan Kuliah Utama telah siap dibina. Begitu juga dengan pembinaan Kompleks Pentadbiran Utama (KPU) telah siap dibina dan dijangkakan perpindahan staf secara berkala akan bermula pada September ini.

Selain durian, tetamu yang hadir dihidang dengan pelbagai jenis buah-buahan termasuk rambutan dan longan serta juadah istimewa.

Disediakan oleh Bahagian Komunikasi Korporat, Pejabat Naib Canselor

Posted By : NORHIDAYAH BINTI MOHAMAD Date Posted : 20-08-2015, 12:03:02